

小倉山房詩集

小倉山房詩集卷三十 三 辰

錢唐袁枚子才

新正二十日阿遲上學

白髮生兒喜不支公然又見讀書時  
傳家事業從今始識字聰明上口知  
秋稻晚栽期望大春鶯初囀發聲遲  
阿翁手授無他物畫日歸來筆一枝

花朝後三日作嶺南之遊留別隨園六首

三年遊屐未曾停又作珠江萬里行  
老驥不知筋力減聞雲只覺往來輕  
天涯禽向寧無伴謂霞裳海外韓蘇合  
有名寄語羅浮丹竈客早教仙蝶下山迎

姜被吾家久寂寥阿連幾度手書招  
弟兄尚有來生約

烟水寧辭去路遙兒女關單求粵遊親朋作餞趁花朝  
天桃莫帶消魂色待我歸來葉未凋

臨行無可繫心腸畧有丁寧語數行播祭教人還故里  
歸寧替女描新榜圖書雨久勤搜蠶蘭艸秋深早護霜  
一事思量終抱歉未能親課兩兒郎

龍門何不挈清娛遊是單身易起居天上送行千里月  
客中娛老一船書嬾開黃歷占良日愛上青山製小車  
到處逢迎常意外不知此去又何如余出門不占日

從古繁華說嶺南及時領畧我猶堪諫梅或有三更夢  
飲水何妨一勺貪未卜花船誰綺麗可知仙荔正紅酣  
武夷峰色匡廬瀑歸路還思次第探

雪華雲意灑然金陵回首隔蒼烟春風替我爲青導  
白髮笑人學少年所到總能增閱歷無求何處不神仙  
兒時記得曾王父八十歸來粵海天

曾祖象春公八十一歲作粵遊

### 蕪湖阻風六日喜諸故人畢至

蕪湖賢士多相識擬到蕪湖留一日何圖舟阻石尤風  
六日舟停行不得故人聞信紛紛來爭攜魯酒談齊諧  
赭山亭邊倚檻坐螺磯裏剪波回阻風領得嬉遊趣  
翻怕風來吹我去但願前途再阻風都像留人在此處  
梅岑弟子情更濃朝朝閒話來舟中祝風留我風不荅  
偷捲長帆當投轄

### 次日風順

六日帆不張一朝風忽利真如暴貴兒得權大逞勢舟  
子船頭眠浪花老夫篷底笑啞啞封姨此情恰不領我  
是離家非到家

舟行十五里至潛岡梅岑饋肴烝遣人剪江而至  
樓上金燈月下烟六宵情話已纏綿挂帆又送先生饋  
香徧春江浪一天

荻港燈下聞笛

荻港燈殘夜色深一枝風笛遠悄悄分明九曲長江水  
都作回波上客心  
如訴如啼水一涯江風何處落梅花此聲祇可衰翁聽  
業已蕭蕭兩鬢華

登小姑山

江心湧一山卓立冠霞表錫以小姑名千年長不老時  
逢三月初烟鬟梳更好高閣雲層層修篁枝嫋嫋長江  
頭盆窻石鏡粧臺小我來拜神前代把落花掃不敢問  
彭郎嫁事何時了只乞少女風一送東飛鳥

過彭澤縣愛其風景清絕有懷靖節先生

繞郭江聲響青山滿縣堂先生宰彭澤儘可做羲皇多  
事督郵至惹人歸興忙千秋一枝菊從此倍芬芳

泊石鐘山正值水落見怪石森布絕無鐘聲

古有石鼓無石鐘此山疏解從坡公道是風水相衝擊  
四更月下聲隆隆我來曳杖走山脚水落潮平見磽确

滿地橫陳怪石供洞庭不奏鈞天樂僧雛引我禮上方  
一湖春水烟茫茫古松穿石枝亂舞頗似相助吹笙簧  
高坐懸厓發遐想平生所到無虛賞且學孫登長嘯聲  
替他代作蒲牢響

鄱陽湖

江盡入湖口漁歌四面聞鞋山標一塔鼉鼓憶千軍浪  
與人爭立天隨水不分匡廬雖在望尚隔幾重雲

客裏

客裏清明記不清但逢楊柳便關情泊船難得有山處  
拄杖忽驚新月生十里村莊喧社鼓一隄兒女鬪風箏  
湖心爲訪蝦蟆石又學飛鳧踏浪行

老夫

老去無心戀歲華  
嬉春天氣遠離家  
鄱陽湖裏推篷坐  
不看梨花看浪花

到廬山開先寺讀王文成公紀功碑二十四韻

兵豈書生事先生川獨殊  
安劉有成算克段在須臾  
少主雖涼德強藩敢覬覬  
鋒烟搖太白聲勢動全吳  
虎穴南昌取狼心北上孤  
指揮銀兔節分散木魚符  
主帥方嘗膽將軍忍惜鬚  
兩甄鳴臥鼓三戰獲雄狐  
力阻親征駕安排所獻俘  
河陽緩巡狩埕澤免追呼  
耿耿憂民意堂堂活國謨  
誰知公射隼正值變攘揄  
不賞陳湯績翻招邵艾誣  
調停十常侍勝縛一庸奴  
暮解三千甲朝持



百八珠蒲團雙膝坐戎馬片言無冰雪心如見豚魚信  
可孚鏡歌書露布椽筆駕珊瑚石壁匡廬鑿龍蛇字畫  
麤歸功天子聖垂戒旬人誅烏鼠驚師律風雲想陣圖  
山河雖鼎革苔蘚未模糊學異朱元晦功同周亞夫燕  
然銘自好相較恐全輸

香爐峰觀瀑

挂起西江水青天作畫看四時常灑雪萬古此狂瀾松  
鬚林嫌濕銀河本不乾磨厓多少字麻列白雲端

行十里至黃厓再登文殊塔觀瀑

黃厓天上生對面作浪起我頭不敢昂誠恐浪壓已豈  
知下望深青天反作底山外有山立山內有山倚頗類

人衣裳幅幅有裘裏忽然暴雨來人天一齊洗避登千  
尋塔正對一條水瀑布從高看匹練更長矣始知開先  
寺相離咫尺耳只爲絕巘遮紆行十餘里

宿瞻雲寺

一宿豈偶然前生有緣在廟額題瞻雲兩樟立門外古  
之宗生菴重修自

昭代琳宮旣巍我金像尤宏大相傳王右軍捨宅作香  
界尚有墨池存清瑩色可愛花隱叢竹中鳥啼磬聲外  
豈不想留連前途有山待

早起遊萬杉寺過三峽澗坐橋上聽水

萬杉無一樹三峽猶存橋未到橋上立已聞橋下潮白

龍從空來騰踔無畫宵誰排石作陣不許逞狂驕一阻  
生萬怒格鬪聲刁騷猛者滅頂過弱者伺隙逃徐者作  
回波疾者奔飛獠聚疑狂泉沸散似元珠跳五百天魔  
舞十千戰鼓器老僧指殘碣有字記前朝橋造祥符年  
石紐猶堅牢玉淵金井字做拂天書雕嘆息來和聖哲  
匠皆倕夔懷古氣彌歛起行目尚搖祇覺兩耳中刻刻  
生波濤

棲賢寺贈道念上人

棲賢寺裏果棲賢留客濛濛雨一天多謝僧雛爲買酒  
袈紫紅濕杏花烟

觀舍利

舍利盛金椀騰光似寶珠取觀還一笑未必老身無

尋湯池沒在荒草中騰騰升氣水淺難浴

湯池如處女生長落荒村不以無人浴而忘本性溫客  
雖相訪少泉是在山尊轉惜華清水繁華易斷魂

過柴桑亂峰中躡梯而上觀陶公醉石

先生容易醉偶爾石上眠誰知一拳石艷傳千百年金  
床玉几世恒有眠者一過人知否不如此石占柴桑勝  
立穹碑萬丈長

謁靖節先生祠

先生非隱士直乃顏閔徒不貪米五斗偏栽柳五株尊  
中酒或有琴上粒并無饑乞一頓食冥報心瞿瞿絕不

作身分隨人作步趨及其入蓮社攢眉強支吾爲佛且不喜何況爲官歟山山白雲似還家春風俱偶然吟一篇太羹元酒初品高情轉近詩淡味乃餘東坡大才人和之形神殊奚論王朗輩敢學華子魚我願生當時長爲扶籃輿

路上憶隨園桃花

柳漸芊綿水漸波隨園此際好爛蘿桃花千樹開如雪讓與漁郎看得多

上五老峰遇雨迷路到萬松坪已二鼓矣

爲詩五老峰走入三里霧地號犁頭尖險絕不容步正在盤紆間暴雨來如注輿夫不知雲踏空如踏路棘蒿

驚刺人十步九欲仆退縮無可歸前行日又暮僮僕齊  
言嘈今夜宿何處用瓦衣亦漏似虎石可怖昌黎不敢  
吳奉先屢悔誤賴聞叫呼聲隱隱出深樹似海得指南  
有寺雲中露急將危苦狀從頭向僧訴自笑三年遊此  
是一劫度

清明

卅年卽煞慰平生垂老誰知福更清萬朵芙蓉千尺瀑  
匡廬山頂過清明

從萬松坪東下一路冰條封山過大林寺舊基愛  
其水石奇險坐觀移時或云卽石門澗也

清明斷雪此語欺廬山三月冰花飛我從萬松坪東下

縱鉚踏破千珠璣行過靜菴禪師塔忽見絕壁高巍巍  
三峰縱橫立水上其勢截嶮形厯屨波濤噴薄萬壑響  
似有深洞蟠蛟螭恨無李清繩身繩又乏温嶠燃妖犀  
姑學兒童飛壻戲投以石子傾駭之須臾不見風雷作  
得毋羊館龍皆癡或云卽古大林寺頽垣尚存舊日基  
或云此乃石門淵水風獵獵時吹衣我亦難考景外景  
且贈一首詩人詩

佛手巖

如來初出世一手拈天生豈料此間石遺存往日情空  
拳拳寶座指月起鐘聲有負相招意詩人只管行

天池

清絕天池水澄澄漾碧空  
金仙常照影鐵瓦不愁風  
日月千峰上江湖一氣中  
周顛遺像在無復弄神通  
周顛

等四  
仙祠

到黃龍寺尚早偕老僧往探龍潭

欲見龍潭清先招佛子伴  
誰知水作聲隔樹龍相喚

從寺東下仍過犁頭尖  
歡喜亭兩險處步行數里

到棲賢寺宿

險途人重經如痛定復作其  
如山上客欲下竟無奈棄  
車徒步行自主轉膽大空空  
仙下天盤盤蟻旋磨索索  
蠚橫爬岌岌箕屐簸非不欲  
三休陡下不得坐所恃性  
命忘一勇敢百懦屏氣羊腸  
踏攢眉虎尾過棲賢長老



來且笑且相賀急呼繩床鋪踵息勸少臥誰知蹀躞餘  
麻鞋已全破

遊東林寺不果

東林未到小車回非戀紅塵忘講臺知道遠公今寂寞  
無人送過虎溪來

白鹿書院

少室山人舊草廬隔朝換作紫陽居一松門外張華蓋  
路旁古松枝葉  
蔽帶號華蓋松五老雲中看讀書白鹿仙踪流水遠青  
衿燈火講堂虛人間何處尋精舍稷下淹中恐不如

回舟星子謝了竹江明府

先生作宰常欲笑如此廬山少人到忽然有客西湖來

白髮看山頭屢掉先生大喜召役夫爲負行李扶籃輿  
入山七日如一世歸來嵐翠盈衣裾握手便詢何處好  
我道黃厓最幽渺對面千尋瀑布飛當空一塔烟雲繞  
先生更喜所見同細加甲乙談羣峰想見文章有定論  
千秋一榜傳宣公王申湖南鄉試吾鄉吳雲巖學使  
預決五人果皆五魁先生共一也詰  
朝置酒愛蓮亭招邀太守聽啼鶯王文未逢千荷池上  
白且看五老杯中青贈我雲箋索題句奈被風吹船不  
住半戀名山半戀公身自長行心未去

泊滕王閣感舊

弱冠曾爲王子安滕王閣下倚闌干清風一席吹西粵  
丹桂三秋折廣寒海內文章傳誦易人生春夢再尋難

誰知五十年前客依舊長江檻外看

蔣茗生太史病廢家居因余到後力疾追陪作平

原十日之飲臨別贈歌

先生示人杜德機儀容清癯似植鱗前年乞病辭 丹墀  
一帆歸臥江之湄傳聞不一多異詞云生云死云垂危  
忽然我到君驚疑如以仙藥投肝脾登時起坐喜不支  
張王神氣開鬚看詞鋒滾滾同平時箋妖語怪談神祇  
口所籌澁筆代搗右手偏廢左手持劈裂箋素磨隄糜  
旁行斜上龍蛇飛錯落蝌蚪皆珠璣雖枯半體坐若歌  
吐氣尚懾千熊羆其宅幽渺樹四圍長廊疏窈窕池  
鼠姑花開香拂衣朝朝飲我酒一卮繁育綺錯堆盤匱

恍如元度離京師真長九日十見之膝前森立三瓊枝  
長君獻賦趨南畿仲子鳴鞭試禮闈三郎長齋步步隨  
搔摩疴癢扶履綦見贈五言玉雪隸才子孝子人中師  
手抱萬首藏闕詩拜述爺命言惇惇屬我細讀加檢披  
意若難逢某在斯士安一序千秋垂其餘作者肱可麾  
琥珀拾芥針引磁濛梁莊惠棊鍾期此中心契非阿私  
我手加額重思維先生遭逢亦數奇少年才名海內馳  
殿上簪筆侍軒義一篇吟成萬口推頃刻官可登台司  
無端奉母江南歸天子時時嘆不羈東山再起欲有  
爲抒所蘊畜佐明治不圖崔崔心事違今之相者但舉  
肥鷺鳩閱邊鸞鳳姿文光雖耀未閃屍天心翻悔生公

非平生嗜義如渴猥專趨人急心孳孳嬰食祿無餘  
 資九族貧者待舉炊耳鳴陰德古所稀以先生擬真庶  
 幾自然食報理所宜不于其身于其兒大昌厥後今始  
 基松根生蘭蘭生芝左視右視堪娛嬉舍飴便足當後  
 者何須更覓倉公醫賢者形衰神不衰王夫人言豈我  
 欺先生未必不期頤恨我粵行難久稽遨遊山川老更  
 痴上堂再拜將歌驪先生掩面心喪其自取行狀付我  
 窺公雖不言我已知果然賤子死或遲貞銘捨我將尋  
 誰我亦自傷兩鬢絲臨行涕下如縷縻今生休矣來生  
 期雲龍相逐青界依天上下無參差長江知我難別  
 離逆風日日船頭吹

重過百花洲

九曲亭臺三面湖南州要算小蓬壺喜逢花柳暮春好  
記得畫船當日無網罟事稀萍藻靜笙歌人散水雲孤  
前朝曾有高人住一道長隄尚姓蘇

南宋蘇雲卿  
隱居于此

謝蘊山戴可亭兩太史招集程園

五輿三菁春滿家重重樓閣貯烟霞當筵兩個鳳池客  
繞砌萬枝蝴蝶花曲水帶雲歸石洞亂紅隨雨落臆紗  
山人船泊江頭月何幸乘風到若耶

題茗生桐下聽簫圖

一枝湘竹最多情吹得英雄白髮生怪底中年謝安石  
愛扶殘病聽秋聲

百尺梧桐倚碧霄三行雛鳳影超超大郎此日迎

鑿

去正學王褒賦洞簫

擗管佳人翠袖孤分明畫出采鸞圖不知元相金闈寵  
我是楊炎許見無

徐穉子墓

不是航高隱其如漢季何功勛歸稼穡氣數聽山河下  
榻知交少生芻涕泪多祇今三八土若个比巍峩

舟移新興洲爲風所覆

移舟非行舟忽然舟覆水幸而中副車所傷尚無幾追  
憶出門時匝月治行李凡是客中需苟有苟完矣一旦  
付波臣空空我面已糝精及盤匱物物從頭始所費既

不貴所具寧能美自嘆七十翁遠行原非理心非利名  
寧興從山水起倘作滅頂占亦是偶然耳風豈有心哉  
未必憐老子因之小坎軻轉生大歡喜徐徐育畜求急  
急衣裳洗記得遼海人常行再生禮

過萬安縣山水漸佳

舟過萬安縣悠然心目閒恍疑仙境入只見好山來樹  
色千層錦灘聲四面雷懸崖幾茅屋遠望似樓臺

從綿津至潁州儲潭得絕句五首

路上綿津不問津儲潭小住拜灘神廟塑十  
八神像欣看一路  
春山好梳就烟鬟若待人

琉璃四面水雲鋪屈曲風帆路欲無畧綴亭臺三兩座



人間何處說西湖

禪樹迷離密不分  
幾聲雞犬樹中聞  
濛濛一縷茅簷白  
知是炊烟是晚雲

漁翁底事不歸家  
細雨濛濛立淺沙  
生怕魚驚竿不動  
蓑衣吹滿碧桃花

莫憚磯多行路難  
但教目悅卽心安  
荆關已過倪黃到  
日日天公送畫看

十八灘

一灘已覺險况乃灘十八  
何年脩羅王留此衆羅刹  
沉者如伏蛟水中  
暗吞鱗浮者排陣圖  
當頭作阻過攤門  
豈安橫井底亂投轄觸船  
或怒僵逢纜必全割  
偉哉篙

丁勇入水將舟奪初將周鼎打纜作宋人振但聞聲許  
許魚知難憂憂周旋石縫中隙僻輒先察堅忍橫逆來  
拱護使上達保國解下裳強磨類鐵拔南船雖將牢北  
兵甚操刺水犀軍已成石婆黨盡殺小洞總是伸大度  
何妨豁三日出重圍槳聲鳴軋軋

南安蔡公子清岷家鏡伊明府招遊了山

峰作雙了勢名應配小姑溪深乘筏渡石墜倩藤扶有  
瀑山才活無僧佛亦孤不知蒼耳子可認白雲夫

過梅嶺

南戒一嶺橫拔地三百丈想見趙尉化借此作屏障樓  
船十萬師到此氣凋喪一朝雖掃除王道未坦蕩直至

曲江公蠶叢始開創，我襄雙闕門尚存。斧鑿狀樹密嵐翠，湧人多雲氣。讓蛇盤不覺險，鵠立始驚壯。過此路漸夷，天容如一放。尚有八九峰，孤蹲野田上。

謁張曲江祠

天寶當年事漸非，先生進退履危機。篋中秋扇恩難忘，天際冥鴻翼早飛。金鑑果教言在耳，玉環何至泪沾衣。千秋丞相廟堂在，留與行人拜夕暉。

到韶州換小舟遊丹霞至錦石巖

看山如論文，所貴在道峭。韶州丹霞山，公然具此妙。我換江口舟，一路搖短棹。所見雲外峰，歷歷呈形貌。高擎玉女盆，銳掛司徒帽。鐘旁一杵懸盤遊，一鼠跳犬半海。

纓綬團團圍百道前  
船人乍指後船人又報  
左失我方  
懸石得我  
又笑忽別忽相逢  
愴恍不可料  
非關山撥我  
有意來作鬧  
爲行曲澗中  
驟難出關  
與宜乎路匪遙  
窮  
日方能到

到山昇腰輿  
屈曲三里許  
絕壁石縫開  
側入步踽踽  
高唱升天行  
踏雲不踏土  
竄身冷翠間  
自笑同蒼鼠  
扶竹兩手霜  
搖松滿頭雨  
斗然鐵門闢  
設險若相阻  
真個一夫當  
千夫難用武  
閃爍鑄金像  
森嚴建紫府  
引水下僧厨  
剗石流縷縷  
何年破天荒  
一衲開萬古  
坐受羣山叅  
朶朶芙蓉舞

晚宿靜觀樓  
懸崖走牕下  
吹落珍珠泉  
滴瀝鳴終夜  
蝶

夢既醒莊屐行重學謝遠尋錦石巖別有奇峰透三洞  
窈而深盤空張廣廈萬孔攢蜂窩似有聲來嚇石色青  
黃朱四時倏變化嘆息造物心奇巧公輸亞小巧使人  
憐大巧使人怕凜乎不可留寒風射石罅

觀音巖

江心望峭壁樓閣生空虛近前覘厓岸方知觀音居乘  
燭走昏黑登級何盤紆已而得光明疑有牟尼珠誰知  
石乳垂倒懸纓絡如俯視長江波萬里聲澎湃帆檣各  
乘風蛟龍或逞怪佛笑無一言悄悄坐香界闔盡小滄  
桑無妨大自在

英德小泊獨遊南山

白一舟來去  
不知水處雖聞香不知何樹管他九曲州波我

過瀨陽峽作歌

水裹山山裹舟瀨陽峽中浪不休石如人立看人遊我  
若不吟被石笑石若吟成被我偷世間奇景豈空設半  
使行人愁半被詩人收我老無愁好吟咏且撒四面篷  
船掉白頭

到峽江寺香亭以詩見迎次韻荅之

峽江寺裏落花天花下吹來詩一箋剛是山僧說山事  
禹陽兄弟兩神仙

白門江上片帆開笑別妻孥首不回伯也年衰狂更甚

一頃吹過萬山來

飛來寺

不是青山生羽翼緣何兩峽如人立空中一寺更嶽奇  
樓臺直欲將天逼我來小住帶玉堂迎面一片屏風張  
濃綠萬重裊錦繡當時帝子猶深藏攀厓繞磴尋幽徑  
流泉未見聲先迎擎雲三樹一根連不知木母如何孕  
條條白練從空斜銀河亂落風雷譁妙有肅齋當瀑起  
坐來看水如看花雲外忽聞曳杖響老僧抱詩來見訪  
半是吟聲半水聲一時作處難分賞下界鐘鳴日漸昏  
轉身急學猿猱奔戲立山門指山笑世間我亦解飛人

僧名  
懷遠

飛泉亭觀霞裳與澄波上人對奕

棋局臨飛瀑棋聲與瀑分下山千尺雪背水兩家軍風裏葉如鬪牕前鳥不聞渾疑仙子戲橘叟與桐君

四月十六日端州楊蘭坡明府劉瓚華叅戎彭謫

堂別駕族弟龍文公宴晚香堂

七十老翁不知老來看嶺南山色好兩株荆樹忽相逢

一朶鐵花開未了

著中鐵樹開花

道家難得來楊修招我披雲

樓上遊閣江寶月次第到此問風景胸全收歸來晚香堂弟問兄知否即日五人同上壽彭鏗斟雉劉安進酒龍文扛鼎阿香走有如不期而會百八國都爲先生一張口千里脯五侯鯖三十六種骨董羹一一羅列求褒



評不怕忙殺天上天厨星果然天星闡酒香張曠頤朶  
雷公狂手持北斗斲仙漿化爲大雨猛如注搖動一堂  
蠟燭光合席蹲蹲人起舞都道今宵足千古十日平原  
何足數師生昆季兼文武誰是賓朋誰是主个个忘形  
到爾汝請各酣嬉將力努珍羞吞盡珠璣吐莫管衙外  
寥寥報三鼓

署中諸友同遊七星巖

端州近海海風厲天上七星吹落地冷翠疑爲精鐵橫  
綿延尚作台垣繫月有廣殿星有宮果然一洞形窻隆  
紆曲佈覆渺難測白日吹雲來陰風滴下石乳久漸乾  
鑄成形怪千百般恍似山靈握肺肝教人一一張眸看

時當四月春流滿山脚沉埋截其半賴有當中酌適高  
行人免作望洋嘆片片青山頂倒垂時時仙鼠聲相喚  
宋唐碑碣鏤紛紛龍蛇健筆祭烟雲想見古來好名者  
恨不將身化石人天門三重闕雲表一重一重登更好  
打頭白鳥飛不高出樹行人看漸小只緣康樂好搜奇  
未免修期常諱老歸飲羣公酒一杯奮然不覺笑口開  
自指脚下雙麻鞋曾踏青天北斗來

蘭坡招飲寶月臺

我聞修月宮裝成需七寶至今端州臺以此得名早楊  
公簿領閒招我作幽討四面清風延一池碧荷小門前  
六榕樹槎枒百人抱屏後七星巖蒼蒼躡雲表主人陳

几筵欲傲古養老不夸五牛烹但求一盞好藁飯液湯  
經精心苦搜考果然虞惇羨竟奪雍巫巧水引尤稱佳  
清絲遊裊裊惜哉廿楚空屬麀尚嫌少有如修羅土噉  
月不得飽飲畢招羽人鬪棋聲悄悄要假羊抗手一惹  
吳剛惱吳協瑣以善奕名故使道士難之累我學樵夫爛柯看未了

端州紀事詩

一詩迎我一詩催驛使奴星日幾回望見端州城牛角  
傾城冠蓋似雲來

忙解征衣掛客運皇華廳上語移時衰翁來意將軍解  
一騎紅塵取荔枝故副戎官公也

子姓相扶上畫堂舉家懽喜道勝常不知此叟三年別

鬢上新添幾寸霜

嬰媿文葆兩麒麟啼笑啞啞滿室春甘蔗旁生如有意

趨儂來作抱孫人嘲阿順

高挂流蘇錦樹東春深人臥鳥聲中所作晚香堂多野鷺鷥終夜明啾

阿連雅得曹參意讓出華堂住蓋公

文武紛紛宴老嫠家家親手動鸞刀為來護世城中客

欲試羹湯若个高

淋浪終夕雨聲酣一月晴無日二三可是佛圖澄姓濕

會來此處築茅菴

怡喜文星聚一時彭楊各各樹旌旗藹堂蘭坡足酬太史東

來意不採珍珠只採詩

賓朋棋子響西齋  
奴子端吭手自揩  
畧見主人停畫筆  
又呼書吏寫齊諧

偃子登場舞拔河壘  
方別自有笙歌  
只因南海波濤近  
半是魚龍角抵多

可笑珠娘負盛名  
我來孤負看花情  
青唇吹火柴篷立  
難近都如鬼手鞿

城門一過三千萬  
南史曾將粵嶺夸  
今日貧泉宛然在  
不知漏滴落誰家

南荒一尉古稱雄  
豪宕于今有素風  
玉鼓金鹽千日酒  
教人能不夢周公

尉尉斗齋  
飲餼精絕

寶月臺邊鳩杖扶  
參天榕覆藕花湖  
七星巖對先生坐

且燕青一語無

勝遊尚欠鼎湖行爲有春江浪未平寄語王喬仙令尹

青山無我亦虛生

蘭坡約遊鼎湖未果

荔枝二十六韵

目暑來東粵炎風笑老夫未歌棠棣什先覓荔枝圖措  
眼看嘉樹逢人間貌姑醜醜星點大漸漸露痕滯外壳  
團黃皺中單綵絳襦梯須乘騾耳網不用珊瑚火齊高  
侵月晶盤早弄珠撕開紫綿襖褪出雪肌膚欲齧心何  
忍輕含舌已酥華池湧靈液透頂灌醜醜媽姣金爲彈  
環肥玉作軀天漿風味別神女色香俱易損憐卿嫩狂  
吞愧我麤口疑成露甕腹恐化冰壺飽極三餐忘柔嘉

百果無楚人休橘頌齊俗撒桃及白馬甜榴賤黃中玉  
 李輸沒投甘谷井剝喚水精奴馳驛名原重傾城話豈  
 誣揮毫誰咏汝碩果尚存吾寵勝紅雲宴忙催竹葉符  
 熱中心早淡消渴病何虞帶葉教人採傾筐滿地鋪半  
 生仙掌慕一夕化人扶尤物堪移矣衰翁其舍諸日嘗  
 三百顆未肯讓蔣蘇紫綿襖見五代史契丹語

蠹魚

不買芸香置五車公然老蠹作生涯分明紙角牙鬚動  
 陡覺書中點畫差未必風騷供吐屬空食糟粕失精華  
 勸君嚼我終無味速往蠹魚註疏家

觀奕

清簾疎簾奕一盤  
臆前便是小長安  
不關我事斜常鐵  
閱盡人心眼更寬  
黑白分明全局在  
輸贏終竟自知難  
憑君着遍飛棋好  
老譜還須仔細看

阿端

端州生子號端哥  
合浦明珠定是他  
索我抱常懷裏奔  
惹人憐爲笑時多  
看兒蠟鳳心如羨  
怒姊飛壻口似呵  
轉眼重陽作周醉  
兒持金印更提戈

端州大水行

端州夜半聲洶洶  
羚羊峽水圍城中  
天公更爲水張勢  
排雲駕雨號狂風  
民廬不見見屋脊  
厨竈掀舞如飛蓬  
羨爲魚鼈身猶活  
化作蟲沙頃刻空  
衆官拒水如拒賊



竹籬衣柳四門塞衣冠了烏負土忙金錢亂擲蛟龍得  
晉陽未沒城幾版王尊立水已三日短衣赤脚出門望  
蝦蟆瞪目坐樓上將軍棄馬盡乘桴士女非鳧齊踏浪  
萬戶炊烟傍午無頭搶足鬪爭相向襁負泣登太守堂  
太守不在誰主張六營馳檄兵借糧畫指券約堆盈箱  
我雖非官敢越俎弟兄急難宜平章不料五千里外餐  
竇客忽來此邦此土同存亡南門已裂北門保上山上  
城奔未了平時只覺眼前安到此方知高處好愧無婆  
留築塘才三千強弩射潮回又無王景堙流法能使耕  
夫盡舉鋪徒學區區韓潮蘇海文惹他江妃河伯來紛  
紛作書魴鯉同一笑中流砥柱今何人目擊哀鴻狀若

其亦有一言告君子莫愁振例此間無一卷檀弓皆物

始廣東劍  
不報災

### 藤鼓

端州城樓有藤鼓以尺圍量丈有五其色黝黝環黑  
其聲逢逢音節古相傳此藤能爲妖晝伏夜見浮作橋  
羅旁水口衆獠賊乘此渡河民驛騷前朝制府凌雲翼  
剪去渠魁掃萌蘗斬藤三段製鼓形分置諸州此其一  
一聲兩聲蝦蟆更三更四更天雞鳴公然瓜蔓一枝艸  
管領金輪萬國明我爲妖藤發長想萑苻同類皆何往  
從古英雄草澤來麒麟閣上爲聲響

### 珠蘭

誰把三湘艸穿成九曲珠粒多迎手戰香遠近聞無籬  
外傳芳訊風前過彼姝閒將纓絡索仔細替花扶

紅豆

生就多情種離離落絳河相思千粒少記曲一箱多丹  
鳳饑應啄紅兒眼欲波倘拋龍樹上佛亦奈卿何

寄鍾姬

不聽釵聲半載餘粧臺眠食近何如愁生夫子登程後  
喜見嬌兒上學初海外朝雲空有夢盤中白玉竟無書  
遙知七夕銀河好嬾畫眉痕月一梳

此間光景遜江東雨慣煙綿海慣風仙荔紅香剛我到  
雪蘭膚色與卿同千家蠻語聽難解兩月螺舟泛未終

寄語金閨諸姊妹加餐不必念衰翁

翟尊江意釣圖

子陵非釣魚不過釣其志先生做子陵借釣抒其意難  
得白描手能寫此高致笠是釣者冠竿爲釣者器絕少  
波濤聲但湧烟雲氣鬚眉更迥然自樂羲皇世我亦釣  
卅年從無一絲繫未能訪桃源來約劉子驥且題字數  
行臨風托遐契

烹珠燻有序

廣州漁人烹蚌蚌躍起三丈許諦視之墜徑寸  
珠爲火所傷作車渠色矣余哀之爲作詩

漁人烹蚌蚌忽怒飛上青天如欲訴須與明月一丸沉

滿江船戶都生怖諦視乃是牟尼珠團團一寸寬有餘  
可憐炤乘驚星色已作焦桐爛梓枯我聞珠能辟火災  
豈知火爲珠禍胎萬物各有遇不過人世原無才不才  
又聞鮫人採珠苦拋擲千夫性命取豈知費盡驪龍求  
一旦混同魚目煮怪底珠猶憤氣含衝烟跋浪飛再三  
玉皇楚國冤雖雪劍化延津死未甘從此漁人生悔心  
撈蚶不敢付釜鬻奈他堆積如山蚌一點珠光沒處尋

端州苦熱行

我聞南越非炎洲四時皆春客可遊豈知我來天時變  
但有火老無金柔祝融呵氣來鳥吐灰焦登罷湯池投  
治病非造軒光籠攻城乃試猛火油熾炭誰安邾子位

燒尾者像田單牛方麪司風懷令史吹綸被體疑重蒸  
無病而炙痕瘡滿不慚而汗浹背流炙艾才避屈笑蓋  
均茵又遇周陽由帶來之熱因人熱使我自問笑不休  
七十老翁何所求捨却江南雲水幽兩袂高蹶來荒陬  
西江舟覆色不變端州水至心無憂可奈秋陽故意暴  
老朽頃刻膚理焦灼聲啁啾有目不得瞻洋樓有脚不  
得登羅浮思量消遣無他法惟有掃除與室爲詩囚一  
枝筆當迎涼草一竿竹對夏清侯阿弟愛我怕我去時  
進瓜果慰勞相遮留試想姜家大被縱然好可能此際  
同眠雙白頭不如一碗冷淘向天祝火傘早勸炎官收  
赤燁勢消白藏至風輪高扇清天秋使我逃出炎涼世

界外依舊赤脚海上自把珊瑚鉤

謝龍文弟餽水

圭頂山頭水貽來感不禁淡如君子友清見弟兄心愛  
惜教儻守矜憐當酒斟故鄉重入夢龍井一泓深

又謝裝衣餅

擬賦湯官餅才慚束廣微漫勞纖手巧來慰老人饑月  
影盤中得水花齒上飛紅綾曾啖過今又嚼裝衣

贈孫補山中丞

卿雲紅覆五羊城物望羣推宋廣平二月桂林移使節  
一江春水盡歡聲胸中定力回風氣筆底餘波寫性情

帝恐黜名掩姘雅重教管領玉堂清

公巡撫雲南後重入翰林校書

此行真不負衰翁得識羅浮又識公同館敢叨前輩禮  
虛懷真見大臣風憐才心在官階外知己情深夕照中  
料得紀恩圖未了珠江轉舵督江東

公畫紀恩圖第  
十六幅名珠江

轉舵

張菊坡太守有伽南香珠余乞之命以詩易

嶺南從古稱香國遠客尋香偏不得菊坡太守古香尉  
胸挂香珠百八粒一珠一粒氣氤氳迷迭都梁迥不分  
庭前風過旃檀樹座上衣熏荀令君野人心貪口難忍  
強顏遽作紫雲請自憐臭味無差池或者主人竟首肯  
主人愛香兼愛儂欲許不許心忡忡自言佩帶始童蒙  
先人手澤在其中業已卅年侍膏沐如何一旦棄秋風



我發調言君且聽楚弓楚得原無定從來湘草佩靈均  
爲他髣髴騷人性同抱留芳百世心何妨脫手千金贈  
主人大笑憐我狂登時解繫我衣裳翩翩鼻觀覺勝常  
夸示賓朋嗅未央從今東郭七旬叟永奉南豐一瓣香  
旬日之中中丞兩饋肴烝賦詩志謝

一接春風笑語溫兩番臺使致壺飧買從清俸情尤重  
捧出軍門物便尊千里脯盛金盃脫三辰酒滿玉昆侖  
自憐七十餐霞叟難學侯嬴說報恩

枚方以詩獻中丞而中丞贈詩適至病中如數奉  
荅卽以留別

正投巴曲到軍門忽聽鈞韶降野濱汲鄭果然能禮士

羣靈原本是詩人筆揮強弩堪穿札氣吐秋雲不染塵  
病裏瑤箋當靈藥一回雜誦一精神

舟泊羚羊峽口邊早聞父老說公賢官如子弟人人見  
政比秋霜樹樹鮮渡海輕裝常載石焚香諸事不瞞天

嶺南元氣非難復只望旌旗駐十年

公有百一山房專供怪石

搗來門外八鷗鳴野叟頽唐廢送迎禮錫百朋裁兩面  
交雖十日勝三生民間疾苦殷勤問海內文章次第評  
我亦臨岐託君子元方有弟望裁成

羅浮擬訪葛仙衣可奈頽禽翅不飛一息尚存山要看  
秋光漸老客思歸掃門魏勃從今遠識曲鍾期自古稀  
回首五層樓在望謝元暉尚夢依依

附孫公贈詩

翹首雲階未許登今朝把手與飛騰文能壽世輕千

劫力可迴瀾此一燈樞地有人誇紫雪廿年前慶樹齋同寅極譚

紫雪軒海山到處引紅藤現游丹霞西樵諸山條水相對青蠅

去陡覺炎埃隔幾層

綺年入洛最知名壯歲游秦宦早成兩卷檀弓寧有

例三生杜牧本多情江山跌宕旁妻好風雨騰馳老

筆橫開說明珠雙照座通延兩公子已能讀父書慰懷何止一官

輕

不遞鄉書不遣媒闐然直為荔枝來文章澤國蛟龍

避先生嘆荔令弟太守署中西漲裙屐僊山蛺蝶陪

將畏權訪羅浮當日登塲誰不識祇今此事更交推自慙海

上孫賓石瘴霧憑公一掃開粵東濱海多霧雨公到後連日晴霽

渡嶺裝歌一葉風小倉紅影落霜楓計深秋方還隨園人將

仙佛疑山賊天造亭臺屬寓公心跡仍依徵士傳姓

名早隸日華宮歸逢謝蔣茗壺趙旣皆吾友為報

居官與昔同

### 遊西樵山左行三里至逍遙石下

冒暑遊西樵為訪白雲洞渡過兩危橋逼仄不容鞵將

身學螻蟻紆曲穿石縫絕壁飛泉奔激怒聲如闕其下

鑿曲池流觴借水送磨厓字紛紛前明遊者衆左轉尤

奇絕逍遙石可弄萬牛輦不前兩手推可動安得秤象

船一試石輕重

山鵲曲靖太守龐義一銘白雲洞三字逍遙石如屋可推

未盡西樵之勝染疾遽返

未盡西樵勝仍回半路槎遠遊原倚健小病便思家落葉長年怯秋風短髻嗟思量瞞阿弟猶恐瘦荆花

服藥有悟

前秋抱腹疾香連一服佳今秋腹疾同香連乃爲災方知內患殊未可一例該天機本活潑刻舟求劍乖善乎莊周言詩書糟粕皆荆公悞宋家直爲周官給

病起遊羅浮得詩五首

遊山如選士佳者拔其尤矧我力疾登羅浮難徧搜名傳華首黨先往作勝遊果然穿磴上古松蟠龍虬兩峰

合掌迎合掌名匹練從空投何時金翅鳥蹴翻銀河流奔

赴此山巔一瀉不可收

西上五百級乃至黃龍觀中湧雲萬重羽扇揮不斷風

停樹聲微花多香氣亂羣僧率眾迎袈裟不掩軒夸我

石樓高指我鐵橋看推牀讓我宿雲臥天之半可惜難

晏眠灘聲早相喚

水黑名曰盧不流名曰奴佳哉五龍潭兩病都已無雙

厓夾青天四面噴銀壺下有獨角蛟沉沉不可呼碑鐫

淳熙年苔深字模糊石刻淳熙已亥良月望日郡守睢陽吳稟男有書又長壽祠三字范

陽祖無擇書其清毛髮見其色琉璃鋪伸手取石子粲粲楞

蒲如我戲投竹葉當作調水符

仙衣化蝴蝶蝶去不我親梅花化美女無花空有村明  
知古人語渺莽難具論奈已書上見未免胸中存參橫  
月落時沉思欲斷竈擬扶綠玉杖一問黃野人

羅浮四百峰所踏都可數只有飛雲嶺吾衰勇難買此  
處號洞天佳名震千古其實幽篁處拔十僅得五大半  
行夷庚黑石臥黃土不信蓬萊峰如此割左股倘取名  
山圖品題甲乙譜吾將不帝秦詎肯中分魯且吟詩數  
草庶免嘲睨虎

贈寄塵上人卽送赴潮州兼申武夷之約

支公最神駿古寺弄松釵經講花知舞詩呈佛說佳能  
叅無上義只喫自然齋幾筆銀鉤字珠娘扇上皆花船

皆上人所書自  
然齋見唐六典

聽說潮陽去聰明學大顛三更鳳樓月萬頃鱗溪烟海  
映袈裟綠雲生畫筆鮮武夷如踐約待我菊花天

宿華首贈寄林上人

華首臺邊踏翠微天風吹冷五銖衣泉衝危石聲如怒  
松立空山勢欲飛鶴爲無齋常看佛龍因聽講屢忘歸  
蒙師引我禪房宿修竹千竿月一扉

到新會同侯羣原明府登圭峰望海上厓門南宋

張陸諸公殉國處

圭峰遠望厓門影南宋遺踪不可求萬里山河無片土  
一朝臣主有孤舟紀侯去國何時返莫叔違天到此休



畢竟忠魂吹未散，瓣香猶作陣雲浮。

謁陳白沙先生祠觀宣德皇帝聘玉

玉形似圭長七寸許青色葵首下削中有小孔  
沁暈紅潤映日瑩然洵古物也守祠者裹以錦  
匣客至許觀

名士當年重三徵尚古風曾將水蒼玉遠聘白沙翁我  
到祠堂拜秋深艸樹空清嚴諸葛像猶自供隆中

光孝寺僧以菩提紗見餉

菩提樹葉傳名久輕似秋雲薄似紗想見此間諸佛笑  
只拈迦葉不拈花

九耀石

海山石厥名稱九耀廢置藥池中落落峰傾側  
根若連鑣水浪時鳴竅其上鐫姓名宋元各年號或云  
熙寧秋避暑搖仙棹或云慶元春泛月恣憑眺篆隸雖  
殊形點畫皆奇與有石人能存有字石才妙嗚呼八百  
年多少遊人到此水聞其吟此石見其貌安得石能言  
一一爲我告

海南雙門觀銅壺滴漏作

鑄銅爲壺高下安四壺畜水藏波瀾中穿小孔相接引  
從高而下瀑布然有銅尺標十二字子午卯酉辰巳未  
一聲一滴一字呈順時而報尺相示我來適直午正中  
銅尺升起如有風旁鐫元帥名某某延祐二年鑄此銅

我聞張衡地儀造最巧八道金龍銜日表一龍機發風  
沙飛隴西地震先能曉又聞田曹叅軍造氣輪二十四  
扇鋪地勻一氣將至一扇動灰飛葭管分冬春此壺偷  
得此消息五百年來滴未歇黯黯色同記里鼓鏗鏗聲  
類知時鐵日有十位朝至暮地有四遊萬里度但憑壺  
尺作圭臬分寸光陰無舛誤老我摩挲有所思壺中日  
月過來遲難忘待漏三商日更憶花神測影時

聞魚門編修乞假赴陝卒于秋旣中丞署內余生  
平至好也賦詩志慟

暫辭東觀走西秦幕府風高遽喪身到耳忽驚腸欲斷  
痴心還想信非真三吳屈指推名士四海同聲哭善人

料得中丞騷雅主不教遺稿付沉淪

送抱推襟四十霜美髯如畫怕思量龐公入座妻孥喜

祖約深談晝夜忘淮上我留常把盞山中君有舊眠床

而今都是前生夢月墮西巖事渺茫

結轡名場卅載餘中年作賦迓繇與稱心竟領三清

職悅日還修四庫書避債臺高難戀關招賢館好易

呼車傷心二月初三札猶自殷勤訊阿如女阿如寄君膝下

羊求結伴意欣然屬我金陵買數椽白首同歸空有約

黃壚重醉竟無緣孤兒尚寄幽燕地君六十二得子才五歲旅櫬

誰扶雨雪天且喜交期泉路在不多時別是衰年

挽大司馬彭芝亭先生三十二韻

四海瞻星象三吳喪斗杓驚心一元老兜率作逍遙  
殿靈光失唐車顯慶荆尚書昔臚唱姓氏冠 中朝給  
札登東觀庶歌到絳霄三雍調禮樂九奏協簫韶陸贄  
嘉謨獻玉珪異數邀衡文屢持尺選士慣乘軺桃李花  
千樹臣心水一條門生多八座故吏亦三貂履曳星辰  
上衣看袞繡飄周官重司馬漢禮絕羣僚公獨謙如故  
人欽寵不驕珊珊仙骨瘦藹藹惠風招舒雁威儀肅黃  
花晚節昭四夷爭拱手百辟盡垂腰兼有林泉福能教  
歲月消抽簪辭 玉殿蠟屐走山椒謝傅歸華屋裴公  
造午橋童時垂釣處鄉里看花朝置酒杯三雅投壺矢  
百驍八旬猶小楷五字極搜雕 闕豈江湖忘心因名

理超花磚兒步武蕊榜婿連鑣

公子紹觀官學士

一

品文成集千秋位不祧鯁生才覓覺都下荷鈞陶者爾

梅開日秋風桂落宵園曾來杖屐詩每贈瓊瑤月落心

常契山頽事豈料黃梁雖夢醒青史定名標語笑還如

昨人琴竟寂寥生芻遙寄奠頭白泪飄蕭

蘭坡明府聞余從廣州歸先在鼎湖延候已五日

矣蓬與同登

楊雲待我遊鼎湖艤舟五日相招呼我約人矣踐更喜

跨上從興行十里守門獅象兩峰迎扶筇先上半山亭

佳境從茲如海湧令人高唱升天行盤盤石磴九重曲

似帶如環往而復秋陽隔樹笠帽涼松陰覆體衣裳綠

溪聲漸大人聲小高厓瀑布飛難了萬斛珠璣撲而來  
五條白練和雲搗我掉身臥浪花中憑他衝去都爲好  
白髮方袍佛子來牽裾同上講經臺威儀戒律都井井  
布金地掃無纖埃正值香花三會日留餐蔬果八關齋  
可奈斜陽紅滿樹心雖尚留身已去重斟尊酒肆高談  
舟中還說山中趣名山烟景主人恩相別如何不斷魂  
留取幾行詩句在大書深刻鎮山門

香亭贈松鼠裘

戲言松鼠爲裘好豈料端州竟有他野色蒙茸身上動  
故山來往樹頭多曾偷仙果遊三島不羨羔羊賦五純  
喜汝相貽最相稱教人遠看似煙蓑

留別香亭

四月珠江賦友于，三秋蘭漿盍歸乎。埴篔簹遠奏音才合，  
鴻雁分飛影又孤。水上風搖青雀舫，燈前人指白頭顱。  
遙知此後重逢處，只有君歸我到無。

小住黃堂燕寢東，可憐姜被幾宵同。三更促膝陪清話，  
一飯經心怕惱公。杖履依然遊物外，笑聲轉覺勝家中。  
緣深更有嬌兒在，索我牙牙抱未終。謂端官

教儂遠上五羊城，海寺花田次第經。沙面笙歌喧晝夜，  
洋樓金碧耀丹青。熏成香界終知幻，夢入釣天幾個醒。  
莫怪老人歸計決，要歸說與合家聽。

歸帆將指粵西斜，五十年前小謝家。趙國遠投蘇季子，



吳公首薦賈長沙溪山似畫些些記東海栽桑事事差  
一旦遼城仙鶴返也應驚殺桂林花

以吾一日長諸昆臨別殷勤有所陳認路莫隨風色轉  
看花須耐雪中春嫁衣目爲他人作金穴誰知住者貧  
倘念丁單門戶薄夕陽紅處好抽身

柳枝不折折荆枝萬里江山兩鬢絲薄暮雲應歸洞急  
多情入每上船蓮生還已遂班超願閱歷重添杜甫詩  
千萬丁寧君莫送送兄難是別兄時

附香亭詩

幾年別夢繞江離盼得歡逢佛誕期兄以四月雅集八日至粵  
纔廢連理句離傷又賦送行詩人歸忽共青山遠手

握難分白髮時欲向尊前訴衷曲秋煙如緝雨如緝  
宗支零落幾人存階有蘭芽未抱蓀荆少莫從分處  
折被寬須共老來溫水雌異派終歸海樹到成陰自  
衛根好向伊南開別墅春潮待我款衡門

說到將歸便黯神鶴鴿原上動征塵歡場况味離方

憶宦境艱難見始真襤襪無端頻觸客嶺南無盛暑今夏酷熱異

常陽侯何苦亦驚人六月間大水城不沒者三板豈因聚首招天

忌故促征車速返輪

風扶簾杖雪盈頭放達能輕萬里遊足底居然騰海

嶽眼中應亦小羅浮若非膽壯無斯會可奈襟分及

暮秋從此晚香清嘯遠兄寓晚香堂月華愁對畫簾鈎

桂林此去訪前緣兄弱冠遊西粵五十年城郭依然

景物遷蝨化定知同小劫鶴歸何必待千年挂帆不

畏征途遠投轄深知地主賢謂汪芝湖太守是我昔時生長

處夢魂相逐繞蠻烟

逢迎隨處可停驂歸去何愁道路難也應山深防雨

雪莫因身健炎溫寒行過湘水秋將盡計到家園臘

又殘稚子候門妻妾聚笑聲遙聽闔家歡

重九後七日赴桂林香亭送至江口

阿弟送我怕我悲誓言明歲辭官歸我道明年即相見

此別愁容休上面可奈臨岐淚又流總緣老字在心頭

江邊望見舟車影各學雙鳧立不休

龍文設餞黃江廠諸公送者自匡返矣龍文獨後  
秋老關津樹有霜吾家臨汝揅離觴淚痕似雨住猶滴  
月影照人行更涼蘭坡在舟中泣下弟亦茫然代製征衣裁縞紵頻  
探食性餽羹湯驪歌爲汝真難賦情比端江水更長

從端江到桂林一路山水奇絕有突過天台雁宕

者賦六言九章恐未足形容終抱歉于山靈也

前望不知去蹤後望不知來路山川如此遮攔不見一  
船留住

山下怒濤空湧水中怪石橫排榜向狼牙曳出舟從虎  
口吞來

鎮日烟村斷絕一時難問迷津頓有鷺鷥幾點溪邊日

送行人

長繩牽上青天一步船高一丈分明水底山多篙打亂  
山頭響

我愛昭平陽朔峰峰長箭鈎連疑是宋康武乙張弓同  
射青天

底事船意忽黑壓來天外孤峰可是女媧擲下有心驚  
駭詩翁

怪似奇鶴九首險如鹿角雙叉四面見孫執笏千軍背  
水如麻

碧簪照水橫荆石笋當空孤插造成阿育天王八萬四  
千寶塔

可愛溪流清淺數來石片分明且作滄浪童子終朝濯足濯纓

舟中又病誓不服藥

常笑王微太認真朝朝昌木不離身我今學得朱雲樣不作呼醫飲藥人

在陽朔寄香亭

半月與弟別昨夜與弟見見弟在何方泊舟陽朔縣漸漸急灘平欣欣夢魂善分明晚香堂弟婦作華餞目疾雖未瘳心情猶繼總吳娃進肴蒸手自舉釵鈿敦女巧言詞聰明堆滿面阿端學走忙踈踈兩脚旋不復索我抱知抱能幾遍我亦傷離筵且喜是家宴有酒姑緩斟

有美或遲嚙庶幾七十翁猶作須臾戀何圖荒雞鳴頃  
刻懽塲變骨肉渺雲烟孤燈明一線曉山更欺人窓開  
如亂箭

舟中贈霞裳

一枝玉樹當筇扶臨水登山與不孤不是子春高弟子  
琴聲能入海天無

挂榜歷名慚秀才了又雙髻是誰裁綠章我欲天公奏  
乞汝三峰架筆來

灘急聲喧鳥不聞柳絲滿樹嘯成羣與君賭向船頭數  
一个峰頭幾朶雲

傳世文章豈易捕會須筆下起波濤水堪招隱都緣曲

山到成名畢竟高

附霞裳詩

歷船山影十分險洗月江光萬派清夜半聯吟同剪  
燭人間應少此師生

飯後圍棋例幾回私心不敢把牕開昨宵底事輸先  
著爲有奇峰數朶來

船行船止任風吹九節吟筇是我持望見前村烟樹  
好先生又是上山時

一雙孔雀一猢猻相伴船頭共作羣啼嘯似知山水  
樂居然清福與人分

讀白太傅集三首

有序



人多稱余詩學自傅自慙平時于公集殊未宜  
究今年從嶺南歸在香亭處借長慶集舟中讀  
之始知陽貨無心貌類孔子然余性不飲又不  
佞佛二事與太傅異矣姑吟三首質太傅并質  
好余詩者

人道儂詩半學公今看長慶集才終宦途少累神先定  
天性多情句自工手把酒杯仍獨醒口談佛法豈由衷  
誰能學華形骸外頗不相同正是同

當年領郡最逍遙吳苑杭州景更饒五馬金鞭朝按部  
雙鬟玉指夜吹簫簿書忙處常休沐僚案閒時替造橋  
滿口說歸歸不得想緣官樂是唐

公道山扶十妓係  
錢太多反置

衰年未免悼龜羅  
駱馬楊枝奈老何  
朝裏最隣朋輩少  
集中惟有妓名多  
詩如天女衣無縫  
心似秋江水不波  
爭怪瓣香人供奉  
元之以後又東坡

重入桂林城作

我年二十一曾作桂林遊  
今年六十九重看桂林秋  
桂林城中誰我識  
雖無人民有水石  
水石無情我有情  
一邱一壑皆前生  
不學習紫齒  
重到襄陽悲不止  
不學武夷君  
逢人開口呼曾孫  
只學藍采和  
踏踏流年自作歌  
更學蒯子訓  
千年銅狄手摩挲  
黃梁一夢誰能再  
我竟來尋夢還在

十月八日同陸君景文汪婿履青及府署中諸君

子遊樓霞七星洞方知五十年前夏日阻水遊未  
盡其奇詩未殫其妙補作一章

山外看青山如把人皮相入洞看青山如扶人五臟桂  
林諸洞皆哈呀就中奇絕稱樓霞窠隆三里相綿延以  
雲作地石作天萬怪惶惑藏其間晉文請隧從此入良  
夫執火誰爭先道人持桶杆買勇作前導指示淨蕪柳  
羣蜂來作鬧指示金鯉魚龍門如欲跳忽然老衲晒袈  
裟忽然漁翁掛笠帽仙人床冷竟忘歸石柱擎空吹不  
倒糾絕陰天既可疑吾公壑谷尤堪笑其他獅駝蛇鳥  
百千餘一一像形誰所造我道諸名皆強呼並非山靈  
有意相描摩萬物有單複山川寧獨無此是石婆石丈

之心腹腎腸耳遊人搜剔作巧屠奇章雖愛那能禁王  
宰善畫或可圖但恐一燈吹滅薪不繼從此我輩斷宮  
乘閉胡爲乎納手捫心方自怖隱隱東方一白露雖然  
報曉少雞鳴漸有微光開覺路洞中久行目盡昏僣僣  
爭往明處奔誰知返射斜陽影還是懸崖不是門

獨秀峰

來龍去脉絕無有突然一峰插南斗桂林山形奇八九  
獨秀峰尤冠其首三百六級登其巔一城烟火來眼前  
青山尚且直如絃人生孤立何傷焉

遊風洞登高望仙鶴明月諸峰

泱泱天大風誰知生此洞古劍劈山開千年不合縫我

身僂僕入風迎更風送折腰非爲米縮脰豈畏凍偶作  
驚咳聲一時答者衆硯散非扣鐘奔鬱類裂甕與艸挂  
綿絡陰冰疑蟬蝻遊畢再登高出洞如出夢一筇偃又  
照兩目闌復縱遠山亦獻媚橫陳怪石供仙鶴不可招  
明月猶堪弄底事急謀歸雲濕衣裳重

普陀寺

一寺藏山四松竹淡如許古佛坐無言流泉代作語

南熏亭

翠竹清沙水數灣亭臺參錯白雲間不圖桂嶺叢蠶處  
也有江南平遠山  
相傳虞帝駐江皋一曲南風平自操今日蒼梧烟月冷

松蘿猶自學簫韶

桂林諸山率皆峭立突然而起戛然而止如古弼  
之頭如汝穎之士爾雅銳上曰融邱是也戲題

一絕

一笑白雲端邊山亦太蠻攢空如欲刺此處作天難

贈吳樹堂中丞

久識東山有慶雲揚來西粵見經綸趙衰人愛三冬日  
崔篆軍班一路春桂嶺高峰天作柱灘江清水玉無塵  
偏于野叟殷勤甚憐是留侯門下人

壬申枚仕陝西  
爲光司寇屬吏

記得袁絲學未優中丞官舍最淹留賦成銅鼓三更月  
表薦釣天萬里秋

丙辰金德山中丞命賦銅鼓薦  
博學鴻詞入都賦載省志中

旣往

事如風過水重來人已雪盈頭幸虧舊雨持旌節猶許  
衰翁處處遊

附吳公詩二首

曾奏長楊鞅子雲管絃湘浦見垂綸洞簫聲重三千  
玉銅鼓詞傳五十春勝蹟每勞青嶂夢舊題自拂碧  
紗塵至能去後無斯客請與壺天作主人

關中駿烈誰能說嶺外高軒我得留壯歲共看華  
嶽雪耆來同泛桂江秋新詞合付紅牙板故曲誰傳  
鞠部頭未免亦嫌金帶重不堪爲賦少年游

重登撫署八桂堂有懷薦主德山公

彭宣當日謫安昌一見傾心在此堂親向燈前修薦表

西廂座上曠文章人天渺渺恩難報函丈依依事未忘  
今夕西州儂再過幾行衰淚落荒莊

遺民難訪地行仙幕府蓮花盡化烟只有庭前丹桂樹  
見公夸許見公憐

接馮星實方伯手書道西江去官光景

西江閒說去屏藩父老紛紛擁馮鞍崔帥留靴沿路泣  
支翁畫像滿城看官聲豈是臨時取膏雨應知及物寬  
底事先生芳訊到尚嫌心力未全殫

訪韋鐵髯鉢園舊居

有序

鐵髯居士故刑部尚書傅胤之門下士也曉星  
學方書尤精導養年六十餘髮不二色以事謫



成桂林築居鉢園當事貴人常詣其家言初濫  
耳聞者謾然丙辰余相見金中丞署中疑是毛  
仙翁黃野人一流今年與李松圃郎中同訪其  
居則已捨作佛寺東廂供鐵髻小像亦復遺失  
因做陸魯望過丹陽張承吉舊居故事賦詩弔  
之

特訪丹陽處士家幾間茅屋供楞伽周顛捨宅人何在

元化焚書事可憐

君多秘方臨終部付焚如

大抵神仙多解脫非關

勾漏少丹砂回思綠髮方墮意化鶴歸來尚看花

門前手栽

杏尚存

德山中丞撫粵九年事在雍正間聞之粵人竟無

知者惟劉仙菴僧恒遠猶能言其顛末

詩

天寶遺民少誰能姚宋知不圖留老納尚解說當時白  
傳逢康叟東陽過婢師一言能感舊雙泪落如絲

余小住桂林與馬嶸山蒲柳愚兩山長李松圃郎

中朱心池明府朱小岑布衣文謙甚權臨行時

五人買舟相送依依不捨余爲愴然到全州賦

詩却寄

重到灘江印雪鴻不圖風雅遇諸公三生自有因緣在  
十日何曾酒盞空爭搗古碑投我好分抄詩本問誰工

關心打槳開船際尚有青琴聽未終

小岑袖詩到  
船中送行

小倉山房

卷三十

望

苔岑未免惜分攜久往黃鸞尚欲啼舟子鳴鉦催客散  
暮雲含雨壓篷低青山耐久情原在白髮重逢事怕提  
知否衰翁行半月夢魂還繞桂林西

岑溪令李君義堂猥蒙佳贈兼索和章舟中却寄

李侯示我詩百首古人已亡今忽有裁駭杜陵闖入座  
旋驚退之笑窺牖健鬪員做兵五千富奪東阿才八斗  
筆所到處鐵可洞彩欲飛時霞滿口歐冶劍鑄吳鉤雙  
項籍力扛周鼎九自言追古如追敵誓不生擒不放手  
自從作吏少知音一卷離騷空繫肘昨宵筮客得袁羊  
如針遇磁北遇牡君戲言得見隨園急乞官假錄舊作  
排比琳琅卯至酉輦卷來呈劉彥和焚香細讀香山叟

感君溺愛似齊植其脰肩肩忘我醜我亦低頭學東野

願作雲龍逐此友桂林喜有舊騷壇十月同傾八仙酒

松圃柳愚諸公共八人南熏亭前把臂行開元寺裏看碑走獲一

奇字輒咨詢考一紀元必分割嘆息宦海人如麻似此  
奇才寧有耦要知孝穆本麒麟此外董龍半雞狗我年  
七十行萬里欽挹心常記某某辱將咳唾贈珠璣勉寄  
獯糝答瓊玖詩成燭跋夢見君未識岑溪月落否

按大司馬慶樹齋手書及貂冠等物賦詩報謝

隨園紅雪軒唐氏棣華屋別君二十年流光如電速初  
聞宰天官繼聞鎮邊塞豈無字數行終嫌萬里外今年  
閱邸報閩地作將軍賤子在東粵歸途擬訪君人言君

驟遷改官樞密府將繼華平業豈作絳灌武果然我家  
信寄來君手書家信半寸許君書一寸餘始知良朋情  
厚重勝妻孥書中何所語感受君恩深叅贊密勿地  
力薄愁難任餘言念賤子絮絮情無已如以九回腸纏  
綿堆滿紙恐書言不足外加詩一幅恐詩難慰寒更贈  
貂皮冠貂冠暖洋洋滿頭消雪霜詩韻繞梁飛滿手捧  
珠璣君爲天上雲我爲山中艸秋艸問春雲尚有幾時  
老

明我齋叅領袖 蹕南來見訪不值將園中松竹

梅蘭分題四詩而去余歸後欽遲不已寄五言

良朋路遠隔一見原知難良朋竟遠至不見心何安  
與我齋公相知廿載寬南北雖乖分吟箋常往還終是  
兩人詩不是兩人面兩人心凄然今生可得見欣聞

鑿輿巡知君必扈行徧觀從臣單竟無君姓名因之走  
東粵不復候里巷豈知君竟來敲門失所望反似尹與  
那有心相避狀登堂旣寥寂題鳳自咨嗟高吟詩四章  
分贈園中花我恨不如花猶得迎君車歸來問僮僕君  
來夫如何車馬可赫赫冠佩可峩峩僮僕爲我言君容  
頤而秀望之若神仙不知是貴冑我老難北走君官可  
南來補此一段緣非君誰望哉倘緩須臾死置君終在  
懷請看翹首鶴日夜盼三台

舟中遣懷四首

習靜三十年忽然愛山遊一年得遊趣三年遊不休戚  
里笑我老搖手止白頭妻妾憐我老亦復相遮留我意  
大不然人生本浮漚倘爲利名出未免心煩憂專爲山  
水行何處非虛舟老健縱難恃觀空便無愁况且腰脚  
輕或者前生修

遊趣夫如何約畧手能數台宕峰巒佳黃海松樹古匡  
廬高瀑飛羅浮仙蝶舞一一收雙眸森森插肺腑落筆  
心有得開卷詩可補更有意外娛逢迎人栩栩公卿半  
擁簪布衣爭納屨或把文盡讀或將詩暗舉驚我是古  
人疑我作仙侶迎則笑欣然別則涕如雨深山窮谷中

牽衣願作主于我何求哉人情厚如許

海內五名山谷來兩高士禽向缺一焉其行亦孤矣我  
攜霞裳生翩翩風貌美詩筆肖三分圍棋低半子三年  
伴奔波一舟共憂喜扶我助登山牽我怕墜水今年學  
更優跌宕到文史味可辨滄漚聲能別宮徵藉此吾更  
豪行行忘暮齒倘策遠遊助應請從隗始

昔人年七十懸車不赴朝我意到明年亦復止遊遨可  
奈武夷山與僧曾有約杭州明聖湖尚想住行脚因之  
自展限還思買舫行又恐隨園花嫌我太無情周旋二  
者間當秋以爲期花旣受溫存山亦供娛嬉心願雖如  
斯仰首有天在茫茫大化中未必我主宰生祭陶淵明



壽藏司空圖笑問雲中君安排得及無

謝李松圃郎中贈石菖蒲

蒙賜仙蒲草教儂老眼清鋪宜青玉案飲稱綠昌明細  
葉迎燈舞輕香繞視生倘將書帶比學愧鄭康成

謝浦柳愚山長贈苗錦

魯望文傳記錦裙邱遲割愛許平分天孫組織輸新樣  
蠻女機絲妙絕羣裁被真堪覆衰老囊詩兼可寄夫君  
只愁疊向空箱去化作華邊五色雲

桂林至興安路止百里舟行十日

虞姁始作舟本學魚尾掉但聞河容刀豈可陸蕩暴我  
從桂林歸冬月水力耗偏以萬斛艘來行三寸濼沙沙

危石齧處處惡聲告賴有百健夫曳舟如曳轎進寸復  
退尺風從浪又拗空作豕負塗難掀公出涼髮絮走荆  
棘所至生阻撓獼猴騎土牛滯留先自笑百里行十日  
幾幾跛躓蒲無怪從者愁躡聚而噪我云子胡然卽  
此可悟道看山如讀書不可求速效杜陵舟楫遲得盡  
所歷妙張融岸上舟居之若堂與夫豈無家哉亦各隨  
所好我今法兩賢少安且毋躁深厲淺則揭能行未可  
料要知隨園梅芳訊尚未報盍約春風陪殘臘一齊到

興安

江到興安水最清青山簇簇水中生分明看見青山頂  
船在青山頂上行

將到湘山寺江上有垂柳一枝入粵以來所未見也

一枝垂柳桂江青霜後依依尚有情可是江南人憶我  
六千里外教君迎

兵書峽

石序

丙辰余過東安舟人指絕壁曰此武侯藏兵書處也諦視之見木匣正方圍四尺許皮山腰間今五十年矣舟過再觀宛然無損雖俗傳譌語可嗤然頗聞閩蜀間往往高崖上有仙床浮舟造物奇詭不可測也

誰把金箱置碧虛相傳諸葛有兵書擬呼羊侃橫行上

取獻

熙朝補石渠

瀟湘

烟波南望楚雲長  
蘭漿輕搖十月霜  
折取一枝斑竹去  
教人知道過瀟湘

二妃廟

翠輦雲旗古殿高  
黃陵風色艸蕭蕭  
碑先啟母傳靈蹟  
歌繼皇娥落碧霄  
穿井能教夫婿出  
渡江不許祖龍驕  
千秋姊妹分湯沐  
天與瀟湘水二條

過永州太守王蓬心留飲署中屬題小像

蓬心先生舊相識  
同看菜花蔣詡宅

誦先親家

分手於今十

八年一朝相見心茫然出圖命我題其像我覺精神比  
前旺羨君還是看花容愧我空留種菜狀我從桂林來  
逢山脚必到知君領永州昏黑還停棹山爲太守召遊  
人君爲羣峰作引導名山名士一時兼心得所好口欲  
笑鉅錙潭綠天菴公子陪儂次第探君贈畫我題詩彼  
此居奇交易之吁嗟乎我與先生雙白頭此詩此畫俱  
千秋

與振之公子遊愚溪

斜曲一溪水雜樹三兩株公然傳至今爲有柳子居柳  
子命此名胸中未曠如當時所施設聰明頗有餘斥罷  
宮市弊召還陸放輿問此詔令新愚者能爲歟天命竟

無常負此心區區萬事論成敗千秋足嘆吁依倚成功  
名古賢亦有諸倘使永貞永未必愚溪愚

到鈞潭尋袁家渴不得

愚溪行半里鈞潭字森森

石上鐫此三字

石秀何妨小溪清不

覺深避人雲自去懷古鳥空吟可惜吾家渴年多沒處

尋

朝陽洞觀會昌元年李坦題名

韋誕昔書菱烟臺黑頭上去白下來朝陽巖高三百尺  
李坦如何能鑄石我想雲梯駕六鰲終難着翅強揮毫  
青山或亦如人長昔日猶低今日高

柳子厚祠

金章紫綬照江濱王者衣冠古逐臣但說權門難托足  
誰知文士易成神宮庭慷慨伊周事湘水淒涼屈賈身  
剩有荔枝丹一曲至今歌徧楚南人

檢得魚門托買屋手書淒然有作

幽居托我訪牆東花裏殷繁樹裏紅白傅正期元尹至  
稽康忽報呂安終彈琴碧海清音斷吹笛山陽舊雨空  
正是思君垂泪際又抽君札亂書中

余永兩州奇石林立如蟲蝕劍穿者江岸不一而  
足置之園中皆千金直也

我本園居客看山便憶園似此嵌空石得一足爲懽天  
偏不愛惜棄擲荒灘往來有舟過鑒賞無人看我欲

攜之歸九牛不能舉我欲盡之歸丹青亦難取惟有學  
米顛拜石與石語嘆息天下才埋沉多類汝

湘水清絕深至十丈猶能見底

湘水無纖塵十丈如碧玉直是銀河鋪不用燃犀燭我  
性不茶飲到此酣于鍾愛極無可奈藏之胸腹中

余登山甚豪客有羨老健者賦此告之

強學修期老去身彎弓盤馬力猶存殘燈欲滅光重大  
寒雪將飛氣轉溫晚菊自香夸老圃夕陽雖好近黃昏  
明年七十筵開後只造生瑩不出門

浯溪鏡石

浯溪鏡石光可愛立向荒江照世界照盡東西南北人



鏡中依舊無人在五十年前臨汝郎白頭再照心悲傷  
恰有一言向鏡訴照僕肝膽還如故

罇尊歌

千尋絕壁立江口上鑿罇尊容一斗有時飲者不經意  
一杯便落蛟龍手想見當年元次山退谷杯湖隨處走  
拉得襄陽孟彥深白浪如山來飲酒吾溪吾亭名不休  
據將公物爲私有我昔來遊美少年我今來遊忽老醜  
新吾故吾尚難占一邱一壑誰能守不如交還與太虛  
遊者何人隨某某千峰看過皆我物千載同心皆我友  
試傾江水當葡萄卽托江風召鰲叟叟縱不來聽我歌  
未必搖頭呼否否

十一月十三日冷水步夜起玩月

霜月兩澄鮮孤篷夜悄然自攜雙鬢雪獨對一江烟  
樹立如鐵寒星搖滿天橫斜幾枝葉也學榜人眠

日日

日日奇峰迎面過不能圖畫只能歌老夫可奈看山後  
愈覺胸中硯礪多

衡陽許吾南明府同遊回雁峰聽芥菴僧彈琴

衡郡小丹邱鳴琴主客遊萬家烟火上一曲楚江秋  
水淡將夕類雲凝不流自憐人似雁到此亦回頭

明府有侍者張彬年二十餘聞余至喜奔告請蘇  
府以得見隨園叟爲大幸出所作詩斐然成章

喜贈一篇

沅江有秀民隱于青衣間見余投名紙欣然喜破顏奔  
告諸幕府當作古人觀聞其性醇粹紛華無所迷主人  
賜婚錢買書不買妻料量典籤事井井魚貫柳偷得趨  
侍閒一編又在手出其所吟咏蠶眠字數行雖未入堂  
奧亦頗具篇章我見貴公子見書如見仇胡汝獨不然  
胸中有千秋又見呼騶人頗多安沒字胡汝又不然觥  
觥有奇志我聞吳皇象爲奴爲大儒又聞漢李善官至  
上大夫觀汝所行爲非其儔匹歟願汝守初志嗜學加  
精勤芝草無夙根名流無出身

遊南嶽登祝融峰觀日出二十四韻

影宿開南戒天神掌祝融名能尊五嶽秩早視三公列

岫規模大明禋典禮隆庥懸牲玉罄象教冕旒崇蒼水

來仙使元圭佐禹功碑刊岫嶮字益施楚王宮廟外有

楚王捨豈止司民壽兼宜祝歲豐雌雄雷肅肅文武露

戎戎石磴攀援上天門呼吸通流泉迎耳奏飛鳥向人

衝繚繞溪成帶鸞環路似弓萬重山在下一座殿當空

未禱雲先散初生日倍紅金輪桑影外玉鏡海光中浴

罷還疑濕吹高似有風聆天霞作彩權火氣成虹紫葢

朝從北黃人捧向東沃焦雖止沸赤堇未消銅笑我來

遷次傾葵慰素衷雞鳴先束帶僧引共攜筇絕好朱明

洞登臨白髮翁暉雖含六辨芒不射雙瞳官久離青瑣

恩常憶紫濛九千七百丈來去愧匆匆

李鄴侯故居

枕罷君王燼已涼衡山暫築小茅堂  
調停骨肉同田叔假托神仙學子房  
一品衣披紫微令半生心在白雲鄉  
浦疑蔓草荒烟處尚插牙籤萬萬行

起程時客有苦勸擇日者笑示一詩

何須六甲卜王匡心是功曹善主張  
展氏自知無隱隱呂才從不信陰陽  
燕知戍已巢雖穩人守庚申道亦亡  
豈若信天翁最好一生所到是康莊

再贈霞裳

孟喜傳經枕膝時田何雙鬢已如絲  
夕陽花影更深月

既得相逢又恨遲

老我頽唐夢不成多君勤學有心情  
湘江籜小燈如雪漏盡猶聞放筆聲

追悼魚門不已賦詩自解

何事人間最斷腸好花吹落好人亡  
易居枚乘忘憂館難覓張衡不死床  
感舊心雖同向秀觀空道可學蒙莊  
須知晨起宵眠際一日輪回有幾場

十一月二十七日素芝軒方伯陪遊嶽麓山

方伯名山主長沙嶽麓高多君陪杖履  
爲我擁旌旄霜葉紅于錦松聲響作濤  
希文有清德應賦履霜操

言尋禹王碣獨上最高峰字冠四千載  
雲封一萬重埋

沙疑有鼓山路踐之聲拄杖戲敲鐘不信開如雪梅花  
滿仲冬

狂風吹日落叱馭急言歸人老知寒早山高見鳥稀道

鄉臺尚在北海筆如揮可惜黃仙鶴乘雲早已飛李邕碑字

宛然惟黃仙鶴三字久斷泐矣

### 方伯儷盆梅

盆梅蒙見贈轉使老人嗟拋却滿園雪來看一尺花小  
枝橫筆架細朶落牕紗夢醒差堪喜開香似到家

### 鴉

牛背一鴉立牛行鴉不行牧童分坐位溪水引前程踏  
愛茸毛軟飛去住輕似招同伴至還向樹頭鳴

偶成

黃髮影毵毵殘冬滯楚南七旬猶欠一五嶽已登三天  
上辛公宅蓬萊白傅龕不知曾築否吾欲問蘇軾

過洞庭湖水甚小

我昔舟泛洞庭烟萬頃琉璃浪拍天我今舟行洞庭雪  
四面平沙浪影絕昔何其盛今何衰洞庭君笑來致詞  
請君將身作水想消息盈虛君自知君昔來遊可有胸  
吞雲夢意君今來遊可是心波不動時春自生冬自槁  
須知湖亦如人老

長沙陸朗夫中丞傾衿相款一如補山樹堂二君  
子風利不泊簡于一言到洞庭賦詩寄懷



白雲雖返岫常愛卿雲鮮鷗鷺雖無求亦受鸞鳳憐賤  
子乞養久巖棲白下園側聞陸敬輿風裁三古前屏藩  
濟魯地聲名萬口傳一朝予告去官若脫屣然山左  
庶獄起惟公名節全

天子弭起公開府湘江邊風過卿知勁事過人知賢安  
得盡公等布置岳牧間自然歌頌其處廷無愷絃我遊  
南嶽返心欽北斗懸特修士見禮長沙爲停船公喜降  
階接握手心拳拳道年十七時嘗見袁絲顏一別卅載  
餘萬事風輪旋感舊旣歎曲餽遺尤纏綿主舟所贈練  
機杼自家穿陽城所分俸公家度支錢譬如仲子井澗  
滴皆廉泉又如仁者粟合以供其先自傷年輩矣報德

如何年行過洞庭湖猶望龍門烟敬寫方寸意寄懷詩  
一篇

再題賈太傅祠

一別先生五十年洛陽年少也華顛自憐枉受吳公薦  
白首重來意惘然

儘把封章奏玉階一時絳灌口難開經生漢代知多少  
屈指誰爲王佐才

多情容易損年華一哭梁王壽竟差若把湘蘭比君子  
春風只發二分花

事定方知石盡高徙薪端不動弓刀如何七國連兵日  
不飛長沙一少牢

一篇鴈賦斷聲聞看破浮生水上雲只恐魂歸還痛哭  
千秋幾不漢文君

息夫人廟

一望靡蕪滿廟青溪風到此似吞聲桃花結子原無語  
鸚鵡移籠尚有情千載香烟誰供奉三年涕淚妾分明  
神巫解得夫人意簫鼓還須陞樂迎

陞樂見宋史

岳陽樓

岳陽樓望水無涯萬里荒荒白浪開氣象果然吞八表  
神仙豈止醉三回靜聽鐵笛聲吹過動覺魚龍影上來  
幾點君山雲外立擬乘風去訪蓬萊

黃鶴樓看雪

漢水茫茫搖白浪一樓高踞浪花上相傳黃鶴此間飛  
至今猶畫仙人像仙人一來不再來我竟兩次騰麻鞋  
更值天公張玉戲雪花片片飛瑤臺鸚鵡洲漢陽樹遠  
望迷離一疋布妙手描成白澤圖長江化作銀河渡卅  
年看雪俱在家今年看雪天之涯遠人行樂足向神仙  
夸可奈想殺小倉山裏千梅花長揖與仙約借我黃仙  
鶴騎上鶴髮翁鶴翅休隨趁此高樓西北風送我連  
夜還山中一天明月一枝筇踏破瓊瑤萬萬重

琵琶亭弔唐蠋寄權使

一曲琵琶白傅賞千秋過者猶聞響遠望孤亭枕大江  
詩人來去都停槳蠋寄先生抱古歡來持英蕩守江關

灑清談羣留古蹟多增架殿對廬山老去風情尤媿媿  
八墨三儒來者喜嬾徵商稅愛徵詩滿亭鋪徧研光紙  
一紙詩投兩手迎敲殘銅鉢幾多聲姓名分向牙牌記  
賓主重申縞紵情酒賦琴歌聽不足風警晨烏夜秉燭  
才子高擎鸚鵡杯侍兒爭進防風粥賤子當年繫短橈  
也會援筆賦鷓鴣東方獸錦筵前奪平一宮花鸞上標  
身世悠悠五十載黃墟白社人誰在侍史屏風艸盡生  
碧紗籠壁風吹壞非關臺榭有凋荒可奈騷壇少主張  
峴首碑移羊叔子鹿門亭毀孟襄陽前供香山遺像  
拆去改立戲臺落  
日憑欄一白頭秋花風裏再來遊關心別有山陽恨不  
聽琵琶淚亦流

彌衡墓

荒墳三尺掩蓬蒿，搥鼓餘聲作怒濤。  
落筆爭夸賦鸚鵡，罵人何苦學山膏。  
干將易折終非寶，元豹難尋始是高。  
知否才流生叔季，揚雲一曲反離騷。

臘月二十六日阻風彭澤諒歲內不能還家賦詩  
自遣

歸舟從上游，白道行必速。豈料叱不張，有類馬無足。  
初阻風，可忍久阻胸，作惡閉置作新婦。稱貞徒縮屋，暫屈  
學尺蠖，鬱埋走窮濱。星飯沙中餐，水襟水上宿。夢裏喜  
篙響，驚醒便張目。頽勞相風竿，若盼大將纛。蹙者不忘  
走螯者，不甘伏南郭。坐惘惘，子貢愁瑣瑣。呼風與風語。

爲戲母乃虐佛家重方便天道有剝復汝送大貴官旌  
旗行稱妮再送巨賈編百貨擁簇簇衝浪不須與其飛  
如箭鏃何獨欺老人有意相束縛稱物而平施亦宜小  
推穀風遣與二來苦言再三言時當元冥令本分北風  
作君須南風吹毋怪行躑躅譬如夏取水又如冬種菽  
所求適相反難從心所欲况君逍遙人風趣最乖俗當  
此臘臘終歸家轉齷齪祀竈封黃羊椒盆堆鬱肉餽遺  
須報謝道券急催促新春賀履端車馬尤僕邀門疊百  
紅箋耳頰干爆竹何如道路中獨享清淨樂元旦不衣  
冠舵工稱萬福代書利市符舟人以紙求寫春聯高懸椀竿燭不  
飲屠蘇酒雖老誰能覺小住彭澤村淵明如有約登山

尋梅看滲詩與人讀春王正月天再唱歸來山

贈折霽山明府四首

各遇蘭山西人

蘭蕙隔千里其氣常相通天風初隕霜商山乃鳴鐘萬  
物以情感其機不可離我與折夫子黃籙分西東忽然  
遇南海握手情雍雍一言若有契千言不能終僮僕驚  
相問此客何山逢

我病旅館中孤燈懸冷光君聞急奔赴更比衙叅忙贈  
我琳琅篇其氣清以蒼縱論至于文百家能平章豈料  
竹皮冠有此孤鳳凰母怪苦相留一刻如千霜古人原  
有之引例請舉將晏嬰遇子皮元度見真長

吾鄉孫中丞眼明一心正

耶律楚材云宰相要兩眼明一心正

爲我言折



君能詩能爲政曾有某疑獄俛張擾五聽獨能料治之  
清瑩如水鏡鞭絲見鐵屑審屠得刀柄古之良吏然于  
茲君乃更賤子聞謾然葉拱起而敬記得少年時曾爲  
秣陵令

傷哉吾老矣此別成千秋雖然相見晚終比未見優君  
爲得霜鷹我爲蘭單牛何時得再逢仰問天悠悠大海  
水可割相思疾難瘳且盡此時情秉燭談綢繆君爲我  
緩歸我爲君少留同拜雙飛鴻他時寄書郵